

الفا جومى

دوخـينى يالونه

- انتهى شهر العسل مع الحكومة بانتهاء برنامج مع إيجان الشيخ إمام من صوت العرب.
- هي حفلة نقابة الصحفيين الثانية قات لرجاء النقاش، إذا كنته زعلانين أخذ الشيخ إمام وبتنزل.
- مصر مليانه بالواهب.. أرنبه براويه مطرح مطروح بتولد.

oboeikan.com

بانتهاه شهر رمضان سنة ١٩٦٨ انتهى برنامج مع ألحان الشيخ إمام اللي كان
بيذاع من صوت العرب بتقديم الأستاذ رجاء النقاش وانتهى معاه أيضاً شهر العسل
مع الحكومه بعد ما اتضححت النوايا وبقي اللعب المكشوف.

سلسله من الأحداث والوقائع عملت تراكم وكان لا بد من حدوث الاصطدام.
أولاً فوجئت بعملية تشويه متعمده أثناء إذاعه البرنامج من صوت العرب أحياناً
كانوا يذيعوا جزء من نص الأغنيه وأحياناً كانوا يذيعوا الجزء الأخير من الأغنيه ودا
كان مخالف لانفاقي مع الأستاذ رجاء- يا تاخذو العمل على بعضه.. يا تركوه على
بعضه- ولما سألت الأستاذ رجاء قال لي ماليش دعوه.. روح اسأل صوت العرب.

واقعه ثانيه كانت شديده الغرابه ولسه لغايه وقتنا هذا مندهش لها احنا كنا تقريباً
بنحبي حفله كل ليله وذات صباح جالنا واحد من طرف الأستاذ رجاء وقال لنا:

- ماتر تبطوش الليلا دي.

- ليه يا سيدى؟

قال لك:

- الأستاذ رجاء عامل حفله لعائلات العاملين فى دار الهلال.

- حاضر.

وبالليل رحنا دار الهلال نزلونا فى بدروم لقينا حوالى خمسين مرا بملايه لف
وكل مره معاها على الأقل ثلاث عيال بيصرخوا أحاول فى الميكرفون أتكلم معاهم
ودول أبداً وبعد حوالى ساعه من الصريخ والمحاييله لمحت الأستاذ رجاء واقف على
باب البدروم ومبتسم رحى له أشتكى له وفوجئت بيه بيقول لى:

- إنت مش فنان شعبى.. سكتهم لو تقدر.

وضحك ضحكه غريبه.. بذلت مجهود خرافي عشان أمنع نفسي من القبيء في
وش الأستاذ رجاء ونجحت - مع الأسف.

الفنان والإنسان الرقيق المرحوم عباس أحمد- مراقب عام التلفزيون - كان
يقدم برنامج اسمه- حياتنا الثقافية- خدنا الأستاذ رجاء ورحنا سجلنا معاه حلقة
مدهشه على مدى ساعه هى مدة البرنامج. وكان موعد إذاعتها السبت القادم ويوم
السبت القادم فتح المرحوم عباس أحمد درج مكتبه وطلع الشريط فى الموعد ركبوه
وإذا بالشريط ممسوح!!!

ما اعرفش اتصرفوا إزاي وتانى يوم جالنا المرحوم عباس أحمد وهو بيكلم نفسه
ومكسوف جداً من اللى حصل.. قلت له- ولا يهملك يا عبس.. احنا مستعدين
نسجل لك أجدع منها.

وقد كان سجلنا له حلقة تانيه أذيعت السبت اللى بعده.

فى أواخر شهر العسل كنت قبل الغروب عند واحد صديقى فى دير الملاك وأثناء
عودتى ما اعرفش إيه اللى خلانى حودت على بيت الأستاذ سيد خميس وفوجئت
هناك بالشيوخ إمام ومحمد على ييفطروا أو فطروا وييستعدوا للخروج وغلط محمد
على زى عوايده وقال لى:

- كويس إنك جيت عشان نمشى سوا.

قلت له.

- على فين؟

قال لى:

- على نقابه الصحفيين.. ماهى الحفله التانيه الليله.

وحسيت بالإرتباك اللى انتاب الشيخ إمام وسيد خميس.

سألت الشيخ إمام:

- انتوا اتفقتوا ع الحفله دى إمتى؟

قال لى:

- كل واحد حر.

تانى يا إمام؟ أول مره خليك فى حالك ودلوقتى كل واحد حر!

خرجت من بيت سيد خميس مش شايف قدامى.

يا ترى المره دى بعتنى بكام؟ يا صاحبى.

كنت ماشى أهلوس لغاية ما لقيت نفسى فى ميدان باب الحديد ولقيت تاكسى

فاضى ركبت وقلت له:

- نقابه الصحفيين.

ما عرفش كان مرقد ايه من الوقت لأنى دخلت النقابه وطلعت على قاعه

الاحتفالات لقيتها مليانه ولقيت محمد وإمام ع المسرح وإمام بيدوزن العود.. أول ما

دخلت القاعه فوجئت بعاصفه من التصفيق الحاد وقفت مطرحة وانحنيت للناس

حتى انتهى التصفيق رحى قازح ع المسرح فى خطوه واحده فانفجرت تانى عاصفه

من الضحك والتصفيق وسمعت صوت من الصف الأول يقول:

- دا قرد مسلسل.. مش حيقدرُوا عليه.

وطيت على وذن إمام وسألته

- قلتوا إيه؟

قال لى وهو مرتبك.

- لسه.

روحت بابص عالقاعه لقيت فؤاد قاعود قاعد فى الصف الخامس مسكت

الميكروفون وقلت:

- فيه شاعر كبير قاعد فى القاعه وهو الحقيقه مكانه هنا ع المسرح الأستاذ فؤاد
قاعود يتفضل.

الناس سققوا وطلع فؤاد وبدأ يلقي وجانى واحد من صبيان الأستاذ رجاء
النقاش وشوشنى:

- الأستاذ رجاء عايزك جوا.

رحت معاه جوا فى مكتب النقيب لقيت الأستاذ أحمد بهاء الدين - ربنا يرحمه -
النقيب السابق والأستاذ كامل زهيرى النقيب السابق والأستاذ رجاء النقاش اللي
سألنى:

- مين اللي طلوع الجدع ده ع المسرح؟

قلت له:

- أنا.

قال لى:

- ليه؟

قلت له:

- لأنه شاعر.

قال لى:

- دا موقوف تنظيمياً وممنوع م الكتابه.

قلت له:

- المسأله دى لا تعينى وعموماً إذا كنتم زعلانين آخذ الشيخ إمام وننزل.

الأستاذ بهاء قال لى:

- خلاص يا أستاذ نجم ما تشغلش بالك واتفصل روح لجمهورك.

أثناء وجودنا فى الاستوديو لحضور تسجيل المطرب محمد رشدى لأغنية الغربه دخل علينا المدعو شفيق جلال وتجاهلنى تماماً وسلم ع الشيخ إمام وقال له وهو باصص لى:

- ما تسيبك ياعم الشيخ م الكلام الفارخ اللى بتقوله ده وتعالى أوديك للأستاذ عبد الوهاب محمد يأكلك لقمه سمينه.. سمينه قوى وخرج المذكور!!

الغريب فى الأمر إنه فى نفس اليوم كنا راكبين عربيه الأستاذ رجاء النقاش ورايحين نوصل سيد خميس لبيته كنا تلاته.. الأستاذ رجاء النقاش وسيد خميس وأنا وفى ميدان باب الحديد وبدون مقدمات فوجئت بالأستاذ رجاء النقاش بيقول لى:

- أحب أقول لك.. مفيش وحده عضويه.. لازم تسيبوا بعض إنت تشوف لك ملحن وهو يشوف له شاعر.

وبعدين وكأنه تذكر قال:

- على فكره أنا اديت الشيخ إمام خمسين جنيه.. إداك نصيبك؟

قلت له:

- أيوه- وطبعاً دا ما حصلش.

ولما روحت قلت للشيخ إمام:

- رجاء سألتنى عن الخمسين جنيه اللى اداهم لك وقلت له إنك إديتني نصيبى.

ارتبذك شويه وقال لى:

داهو قال لى إنه إداك زيهم

قلت له:

- طبعاً أنت صادق ولعلك تكون فهمت اللي هما عايزينه.. يا إمام إحنا حياتنا في التحامنا ببعض.

قال لي بمتهى البراءة:

- وهو ده اللي أنا حريص عليه!!

دوامه مرعبه من الأفكار السودا خدتني دوخيني بالمونه..

لوحدك بقيت يا بن هانم وإن ركنت حتركن على حيطه مايله.. ياللا أديك عملت اللي في دماغك ووحياة النبي ومن نبي النبي لو علقوك في ميدان التحرير زى الدبيحه وخدوا من لحملك كل يوم جرام ما يبقوا خدوا حقهم منك.. إنت عايز إيه تاني؟

فقت من أفكارى على صوت بينده من تحت:

- يا شيخ إمام.. يا نجم.

قلت:

- مين؟

قال لي:

- أنا أحمد بهجت.

قلت له:

- اتفضل

الساعه كانت حذاشر صباحاً وما حدش صاحى في البيت غيرى وصل أحمد بهجت الباب وقال لي:

- أنا جايب لك معايا شاعر عظيم (ودخل ووراه الساعى بتاعه لابس جلابيه حلق كنيف زفير وجزمه كوتش صوابعه طالعه منها) هما دخلوا وأنا فضلت مستنى ع الباب.. قال لي:

- ما تيجي.

قلت له:

- فين الشاعر العظيم؟

قال لي:

- ما هو ده الأستاذ أحمد الغندور.

دخلت لقيت الشاعر العظيم قاعد مقرفص ع الأرض فبدأت أتعامل معاه بألاطه... شاعر إيه ده؟... دنا كل يوم فى الجرايد والراديو والتلفزيون كاهه شيء ناطق أو مكتوب واللى أكد لى الفرق الرهيب بينى وبين الشاعر المقرفص إنه كان بيكلمنى بمنتهى الاحترام حضرتك ويا أستاذ أحمد وأوقات... يا أستاذنا.. عايز إيه بقى؟ ورمت طبعاً وانتفخت على سنجة عشره.. دنا كويس إن ما فرقتش فى وشه وبعدين البدله الفخفينه اللى لابسها أحمد بهجت مدمره منظر الغندور أبو جلابيه زفير حلق كنيف.. وجاى تقول لى شاعر عظيم! واستعديت عشان أقول له:

- قوم ياد اعمل لنا كبايتين شاي أنا وعمك الأستاذ أحمد..

راح أحمد بهجت قايل له:

- سمع عمك أحمد حاجه يا احمد.. سمعه الدرہ الصفرا..

وبداً صاحبنا فاكشفت من لهجته إنه شرقاوى لأنه يقول الشعر بالفلاحى.. أما القصيده فبتحكى عن الدرہ الصفرا اللى كانت قبل سنه ١٩٥٢ علف طيور الفقرا لأن طيور الأغنيا يا إما بتاكل قمح يا إما بتاكل دره شامى بيضا.. تعالى النهارده وشوف الفلاحين بيقفوا طوابير على شونه بنك التسليف فى كل قريه وبياكلوا ضرب مخبرين بالخرزان عشان الواحد فيهم يطول كيله من الدرہ الصفرا يطحنها ويخبزها لعباله!!

رحنا نجيب الدرہ الصفرا.

وجفونا صفوف!

القصيده على بعضها أنا نسيتهما لكن اللي صعيب يتنسى هو مطلعها:

سنين العزيز

رجعت ببجھطها المعروف

والفجر عم البلاد

وجوم يا يوسف شوف

صرخت من أحشائي:

- يا ابن ديك الكاالب.

ونزلت على ركيى وزحفت وقعدت جنبه ع الأرض وأنا حاسس إنى فى حجم
حباية الدرہ الصفرا.

كان لازم يحصل لى كده عشان أخرج من الدوامه.. وخرجت حسيت إنى مش
لوحدى.. ياه! دا مصر مليانه.. أرنبه براويه مطرح ما تروح تولد وتسبب عيالها
يكبروا فى الجحور لاحد يقدر يحصرهم ولا حد يقدر يسيطر عليهم.. أثارىكى ما
بتموتيش يا عجوزه يا صبيه! يا أم طرحه وجلابيه يا بنت الكلب.



فى حفله بيت الطلبة المغتربين وبدعوه من اتحاد الطلبة الأردنيين بالقاهره فوجئنا
بوجود الأستاذ عبد الوهاب محمد مؤلف الأغاني المشهور مدعو لإلقاء بعض
أشعاره.. أنا الحقيقه أهتمت إنى أسمع من باب الفضول- مش يمكن عنده أشعار
وطنيه?.. طلع قال تسع قصايد عن ضفيره حبسيته من أول شعر البطن لغايه ما بقت
أربعه متر والآخر اكتشف إن شعرها ذهب!

وبعد ما خلص أنا تصورت انه حسيجى يسلم علينا ففوجئت بيه بيقول
للحاضرين:

- ودلوقتى أنا بافضل لكم تقوموا تروحوا حفله الست أم كلثوم!
قلت له فوراً:

- إحنا معانا تذاكر ورايحين يا أستاذ عبد الوهاب استنى خدنا معاك .

وقبل ما يفكر يقبل أو يرفض كنت ع المسرح وماسك الميكروفون وباقول قصيده
- كلب الست- بس.. وخلاص.

طب مين اللي داعينا ومين اللي داعى الأستاذ عبد الوهاب؟

الحكاية دى فكرتني بحفله دار أخبار اليوم اللي كان رئيس مجلس إدارتها الأستاذ
محمود أمين العالم (ماكانش لسه بقى دكتور) واحد من رموز الحركة الشيوعية
العربية.

يدعينا فى حفله.. دا مفهوم.. إحنا بنغنى للعمال والفلاحين والصعايده وبنغنى
عن چيفارا وفيتنام وفلسطين.. لكن يدعى معانا الشيخ نصر الدين طوبار عشان يقول
تواشيح ومدايح نبويه؟.. دى مش تبقى فزوره! دماغى كان حيطرشق لحد ما
حجازى قال لى - دى اسمها لعبه التوازنات يا حمار.

كده ارتحت شويه ولو إنى لغاية وقتنا هذا مش فاهم يعنى إيه لعبه التوازنات..
لكن أدبى عرفت إن فيه حاجه اسمها كده وع العموم لاعور أحسن م لاعمى.



أما حفلة محمد جاد اللى عملها لنا فى بركة السبع فدى حدوته كانت حتتهى
بكارته- محمد جاد شخصياً كان حيروح فيها.. حيروح حيروح.. مش حيثجس
يعنى.. لأ دا كان حيروح مورته.. كان حيموت.. إزاي؟ أنا أقول لك.. راح لواحد
من تلامذته فى الاتحاد الاشتراكى العربى اسمه لطفى الحفناوى.. ولطفى ده جدع
طيب وخدم ورايح لاتحاد لاشتراكى عشان يخدم!! شخص أهبل يعنى.. قال له:

- واد يالطفى.. إيه رأيك زى ما عزمنا الأبندى نعزم أحمد فؤاد نجم والشيخ
إمام وانت اللى تعزمهم باسم أمانة بركة السبع.

قال له:

يقوم يتفتق ذهن محمد جاد عن فكره جهنميه إنه بالمناسبه دى يفتتحوا مسرح
بركه السبع اللي مش موجود أصلاً! لكن عند محمد جاد مفيش مشكله هات ياد
بالظنى الفلوس اللي فى جيبيك.. طلع لطفى الفلوس اللي فى جيبيه وإنت ياد طلع
وإنت ياد طلع العيال كلها طلعت اتجمع فى إيد محمد جاد مبلغ مش بطال بعث
جاب خيش وخشب وراح على حته واسعه دق سدائب الخشب فى الأرض ومسمر
فيها الخيش بدل حيطه والسقف مش مهم علماً بأن الحفله كانت فى عز الشتا وكنا
حنموت أنا وإمام م البرد..

عمك محمد جاد لزوم المنججه بعث جاب كام علبه لاكمه فضى عشان يظبط
الشغل والمسرح يبقى لميع نسيوا يجيبوا فرش له للدهان أو الفلوس خلصت مش مشكله
قوم إنت يا عم محمد جاد إدهن بإيديك.. وطبعاً محمد جاد زى حالاتي ضوافره
دائماً طويله خش اللاكيه بين ضوافره ولحم صوابعه ولبد تعالى يا نت يا عم لطفى يا
حفناوى تشجيعاً للأستاذ اللي بيشتغل بإيده خلى مراتك تعمل أنجر رز بلبن وخده
على موقع العمل وبالله يا أستاذ الغدا.

قعد الأستاذ بكلوه إيده حول نص أنجر الرز على معدته.. أثارى اللاكيه ده
سميات ما فيش خمس دقائق والمغص اشتغل فى مصارين أبو جاد زى ما يقولوا-
أعطى ساقيه للريح- على فين؟ ع المستشفى وهو بيجرى لقي واد راكب عجله راح
ناط ركب قدامه وع المستشفى ياد بسرعه.

وفى المستشفى عملوا له غسيل معدة ونيموه على سرير نضيف بملايات بيضا بناء
على أوامر الطبيب اللي هو فى الأساس من تلاميذ أبو جاد. فاق محمد جاد من
الإغماء بعد ما شعر بزوال المغص ببص هو فى لقي ممرضة حسناء قاعدة جنبه وهو
رافل فى المفروشات البيضاء ففوجئت الممرضة بمحمد جاد بيهتف بعلو صوته:

- يعيش أحمد فؤاد نجم يعيش الشيخ إمام عيسى...

ولولا الطبيب كان أبو جاد اتكتف فى السرير وصبح تانى يوم اترحل ع الخانكة
بقميص الكتاف.